

Headline	Illya Ireeza Tulis Novel Dalam Usia 14 Tahun
Date	16. Jan 2008
Media Title	Utusan Malaysia
Section	Dlm Negeri
Circulation	238082
Readership	833287
Language	MALAY
Page No	16
Article Size	289 cm²
Frequency	Daily
Color	Full Color



ILLYA Ireeza Noor Zehan menunjukkan dua buku siri pengembawaan yang telah dihasilkannya di Taman Cempaka, Melaka, semalam.

Illya Ireeza tulis novel dalam usia 14 tahun

MELAKA 15 Jan. – Tiada siapa menduga dalam usia yang begitu muda, seorang remaja dari Taman Cempaka, di sini telah berjaya menghasilkan dua buah novel hanya dalam tempoh beberapa bulan.

Itulah keupayaan pelajar tingkatan tiga Sekolah Menengah Tinggi Perempuan Melaka, Illya Ireeza Noor Zehan, 15, yang telah berjaya menghasilkan dua buah novel pengembawaan remaja.

Illya Ireeza atau nama penanya Lala Zehan berkata, kedua-dua novel tersebut hasil pengalamannya sendiri ketika bercuti di beberapa tempat di dalam dan luar negara.

"Bagaimanapun, ada juga unsur-unsur rekaan dalam kedua-dua novel ini bagi menjadikannya lebih menarik," katanya kepada *Utusan Malaysia* ketika ditemui di rumahnya di sini hari ini.

Kedua-dua novel tersebut dihasilkan ketika dia berada di tingkatan dua, tahun lalu.

Novel pertamanya diberi judul "Lala Zehan dan Serangan Lintah" diterbitkan pada Oktober tahun lalu manakala novel "Lala Zehan dan Penyeluk Saku Baguio" pula diterbitkan baru-baru ini.

Kedua-dua novel tersebut diterbitkan oleh ASFi Sdn. Bhd., sebuah syarikat penerbitan yang dimiliki ibunya sendiri, Noor

Jehan Dom.

Anak sulung dari tujuh adik-beradik itu berkata, dia sedang menyiapkan sebuah lagi siri novel pengembawaan Lala Zehan yang menceritakan kisah pengalamannya di Langkawi.

"Terima kasih kepada ibu saya yang banyak memberi dorongan kepada saya sehingga mampu menghasilkan novel ini. Saya harap ia dapat diterima oleh para pembaca," katanya.

Ditanya sama ada dia mendapat bimbingan mana-mana pihak untuk berkarya, dia berkata, dia hanya menghadiri satu bengkel penulisan anjuran Universiti Putra Malaysia (UPM), Kuala Lumpur awal tahun lalu.

"Sejak itu saya bersemangat untuk menukar ditambah dengan langkah ibu saya yang memberi peluang kepada mana-mana anaknya yang mendapat pencapaian akademik yang baik untuk bercuti di tempat-tempat tertentu," katanya yang bercita-cita untuk menjadi seorang peguam.

Nor Jehan pula berkata, anaknya itu memang suka menulis dan minat itu dipupuk sejak di sekolah rendah dengan menulis pada kertas-kertas nota.

"Pada mulanya saya tidak tahu apa yang dibuat dengan kertas-kertas itu tetapi apabila mengetahui bahawa dia suka menulis, saya terus beri galakan," katanya.